

校刊摘星樓治痘全書序

人之有痘疹古未嘗聞或謂起唐末五代時竝無顯據顧俗稱痘瘡爲小兒丹毒又云反花瘡宋郭思賢取孫思邈所撰千金方擇要刻石書中已列其名似唐以前固有之陳振孫書錄解題有宋董汲小兒痘疹論二卷疑亦謂此疾而其書不傳至周密齊東野語載趙賓陽說證藥乃與今同近世則若徐謙仁端錄汪機痘證理辯徐書詳而汪書略要皆未滙其全也我族前明隆萬間應我先生諱一麟爲以九公苞


之父以九公騰聲復社撰述甚夥學實自先生開之
先生少穎慧繼厥考青囊之業動多懸解由歲貢生
中副車勝流推重阨於遇因專習醫而治痘疹尤神
雖奇險應手立瘳久之著書曰痘科大成大旨溯源
錢仲陽而輔以諸家仲陽名乙宋史方技傳稱其以
顓顓經著名幼科冠絕一代考仲陽書祇存藥證真
訣尙有闕佚故於小兒諸病條列至詳而痘疹未之
及然仲陽曾爲董汲癍疹論作序則其究心是事可
知已書豈轉遺之觀先生所引語精而義該斷非依

託殆正在闕佚卷內足徵當時窮搜博覽猶逮見其
原本矣若元明以來變證愈多著方立論亦愈繁致
攻補異途寒溫殊用斷斷啓門戶之爭先生兩無偏
主獨能探其蹟以通其微以之保赤洵乎其爲拔苦
金丹哉雖然是書之造始爲蘧廬遊戲二編尋輯痘
成發揮而緘藏於旌邑戴氏先生乃更纂大成雕板
板旋燬一再傳俱在本族倍加珍守蓋歷久至

本朝乾隆中而是書之沉晦已百數十年俄族叔采
庭百計購錄之然亦未以示人也余從父遵先公丐

得其書一甌之借刻期待歸急命羣從晝夜分繕而
副本始就續又得發揮本則曩藏戴氏者遂成連轅
而遽廬遊戲亦應時而獲諸塵垢殘蝕之餘公喜
取先生讀書舊地名之曰摘星樓治痘全書儲貲將
授梓未幾歿彌留時猶以是書諄飭後嗣嗚呼書之
成以救世耳固爾滕篋徒飽蠹蟬譬之井有幕寒泉
雖冽澤不及物如公仁心爲質廓然大公視郭象之
竊莊注蔡邕之秘論衡其邪正廣狹相去何啻霄壤
今公子學圃兄承志剗剗適族叔鳴鑾出鈔本爲證

與公最前所得本無異復別示刊本稍有增補外火
攻穴法數則不知誰作術頗可採隸末簡以行藏事
屬余叙其端余審核原委知秘笈之存雖局鑰如魯
壁如汲冢終必昭闡而衆本蒼萃意亦造物特作之
合乎由是而治痘者奉爲楷模則公有功於是書實
即有功於斯世公第七孫煒第十二孫煜董役讎訛
咸與勞并附著焉時道光六年歲在柔兆閹茂秋八
月上澣姪琿謹撰



痘科大成序

吾族前明隆萬間有痘疹名醫諱一麟字應我其先
世業醫而於痘症最著公由歲貢生中副車自幼
經鑄史家學淵源雅不欲以岐黃終曾構別業於鄉
之城山裏扁其樓曰摘星與一時英俊講論肄業春
花秋月實有賞心乃屢困場闈壯志莫伸遂謝舉子
業從其考講論醫理公天資敏捷數月而盡得痘症
之奧旨適江上痘症大作公偶由太平水路訪友金
陵隣舟有徽客年六十餘一子甫十齡忽染痘表實



南京中医药大学图书馆版权所有

火盛痘粒俱伏於膜外皮裏時舟上請醫已六七人
或攻或補逼毒不出以致脹痛氣絕徽客已辦斂具
矣公適至審視語徽客曰我爲爾活之同舟皆掩
公教以急買新漆大長橙一條噴以山谷冷泉裸兒
臥其上遂拉客過舟共飲壺未竟兒大叫號視之痘
盡出矣公細心調治數日遂瘳客遂同公至金陵大
爲表揚受其惠者迨遍後客回里又廣爲傳播休歛
六邑凡染痘者皆以不得遇公爲恨又嘗晝臥夢至
維揚治一險痘越一月有維揚鹽客賁金帛訪至摘



星樓請酬時公先數日往旌德家人見客問其故客
曰予亦徽人寓揚貨鹽因家焉子染痘病極危險先
生神醫之名耳熟久矣但未謀面又恨揚去涇千有
餘里何法得遇先生而救藥之無聊之思望空焚香
哭訴欲假兒延半月之間以便兼程相請憂愁之至
頭忽昏八內強臥家人急報曰廳上忽來一人口不
能言大書涇川朱一麟至予亦將信將疑出見而禮
之不答但書速抱兒至予趨內抱出先生微笑又書
云此兒爲酷暑所傷服涼膈散可愈書方始就轉眼

不見兒服藥果愈今特訪酬併帶方以証之家人閱其筆墨實公手跡也互相駭異後公回詢之果有是夢公之名因是益著於徽揚間後公因丁父艱家居鄉人之受其惠者不下數萬公遂閉戶纂輯痘成發揮遍教後學有旌邑戴生者受業於公久乃竊攜公所著以去今三溪之戴家痘科世傳其業公又纂輯痘科大成盡傳其奧旨於本族某公書將成而公卒公裔皆一時英傑如以九公等名著江浙篤志好學不屑以痘疹見長惟某公得其術鄉里痘症稱神者

數十年但不肯廣傳於人既歿而其家人不爲珍惜
其書扼於粉壁糊窗者半敗於蟲蠹鼠耗者半越數
十年後始有某公族親號某者留心醫業取其殘篇
剩頁推敲之不數年又尊某爲痘症國手矣某益秘
其本雖至戚密友未肯輕借一觀臨終且囑其子曰
吾土田基業爾不能守任爾易之此痘科大成乃吾
半生心力所在其秘而藏諸可也子亦承父志凡有
道及是卷者皆謝爲無有惟輝與稱莫逆交百計祈
丐始得強借一錄又祇約五月爲期逼於期促夜以

繼日七越月而始告成嗟乎著書者實嘔一生之心
血而錄書者亦已竭半世之苦功矣夫嘔心血而竭
苦功者無非欲普天之下無一嬰一稚之或殤於痘
症云爾彼蒼者天尙其鑒之乾隆乙酉重九後二日
八代族孫在田拙夫安輝采庭氏謹序



治痘大成集自序

夫夫也有立德立功立言三不朽事余今日不克印
尼山心習蟠溪釣握康成管乃俯首效秦越人入咸
陽殉咸陽人愛小兒心因而提小兒出鬼入人之關
也夫小兒度人鬼關獨痘症命懸一絲小兒以不絕
之縷屬父母父母以小兒不絕之縷屬國手業號國
手矣敢螻蛄視嬰命拾方技之藩而不博秦越人以後
諸醫王之唾餘哉故分藜火殘燼窮搜古今稗官野
史之所藏載開門列款逐款彙集備覽則甲乙皆收



重複則豕亥無擇凡痘之時候始終形色榮枯其間
百症之臚列千方之碁置諸般變態靡有缺遺將令
前之作者九原可起而後之述者豈至沿門持鉢效
之貧兒哉吁嗟此集成痘事之德與功與其言俱傳
矣然而一生之德功言何無竟也醫爲一生之事業
漚泡耳痘尤醫事中之漚泡耳揮戈轉照下帷絕編
猶未晚矣如曰此殆求名也將以災木者付祖龍萬
厯己未夏五國子生朱一麟應我序於摘星樓

余閔家少多未度此關故讀書外偶習此業以爲

救度浪得其名不能謝郡邑之車騎昔年已寫蘧
廬遊戲二編識淺見俚有論無方宜高明吐之耳
二十餘年向長安射策不遇而歸乃坐巖洞內觀
涉黃岐靈素及華扁張成以下昭代名公蠹簡殘
篇忽栩栩覺而痘事拾千百於一二聊寓言爲大
成集顧瞻舊業又若爽然失矣然而都非余心也
漆園則任呼牛呼馬余則任呼儒呼醫摘星樓主
人朱一麟再誌

治痘大成序

吾叔父之遊戲於痘之三昧也叔父非以醫起家也精於儒而偶以發抒其仁天下之心耳蓋叔父幼而靈慧撝角時卽善屬文見奇於京兆鄭公及弱冠就試見拔於金谿李侯爲青衿子入成均而大司成馮具區傅商盤兩先生更崇獎之僉曰石城奇士乃試闈中兩有掄元之薦而兩落乙榜何大才者竟艱於遇乎雖然以遇則艱矣以痘術乃日精矣然又何以精痘術也自攻苦書史遂邁一疾又不欲以疾廢也

日與三折肱者商藥石以故精其術焉且叔父素與
醫隱楊子友善楊子誇有痘術叔父憐家少未度此
關者六七子兩相訾欬大有竅妙過楊子因著痘言
蘧廬集藏之笥中挾以應家痘外痘無不隨匕而效
若郡邑之車馬駢駢至矣邇來術進斲輪余輩請曰
若此蘧廬有論無方難授下根人何不普渡世以寶
筏乎於是搜古今名方錄之成帖命爲大成將令窮
鄉僻地不獲解叔父之肘後奇者咸得以展書按方
飲一滴活一命而痘孩有起色矣家戶戶祝券可知

也余固知治痘之心爲仁人之心集古之言爲仁人
之言也其行滿矣其功成矣博一第猶不足以報也
今日之渡人豈不如古人之渡蟻乎而災梨者卽其
植槐者也萬曆庚申春正月姪國用謹序